

ORIGINAL

Apelacioni sud Brčko distrikta Bosne i Hercegovine u vijeću sastavljenom od sudija Damjana Kaurinovića, kao predsjednika vijeća i sudija Ilje Klaića i Maide Kovačević, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi I. B. iz P., općina O., na osnovu člana 2. i 18., stav 1., tačka a. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti („Službeni glasnik Brčko distrikta BiH“, broj 45/10) na sjednici vijeća održanoj dana 29.11.2011. godine, donio je slijedeće

RJEŠENJE

Inicijativa za pokretanje postupka ocjene usklađenosti Pravilnika o radu i načinu rada Stručnog organa za kontrolu i nadzor nad sprovođenjem propisa za osposobljavanje kandidata za vozača motornih vozila i polaganjem vozačkog ispita, broj 37-000453/11, Odjela za obrazovanje Vlade Brčko distrikta BiH, sa Zakonom o sigurnosti prometa na cestama u BiH („Službeni glasnik BiH, broj 06/6, 75/06, 44/07, 84/09 i 48/10) ODBACUJE SE zbog nenadležnosti.

Obrazloženje

Dana 02.09.2011. godine I. B. iz P., općina O., podnio je inicijativu kojom traži ispitivanje zakonitosti Pravilnika o radu i načinu rada Stručnog organa za kontrolu i nadzor nad sprovođenjem propisa za osposobljavanje kandidata za vozača motornih vozila i polaganjem vozačkog ispita, broj 37-000453/11, Odjela za obrazovanje Vlade Brčko distrikta BiH, (u daljem tekstu Pravilnik) sa Zakonom o sigurnosti prometa na cestama u BiH („Službeni glasnik BiH, broj 06/6, 75/06, 44/07, 84/09 i 48/10).

U inicijativi se navodi da član 177. Pravilnika nije u skladu sa Zakonom o sigurnosti prometa na cestama u BiH („Službeni glasnik BiH, broj 06/6, 75/06, 44/07, 84/09 i 48/10), jer je pomenutim članom dato šire ovlaštenje u postupku kontrole Stručnog organa za kontrolu i nadzor nad sprovođenjem propisa za osposobljavanje kandidata za vozača motornih vozila i polaganjem vozačkog ispita, od onog propisanog navedenim zakonom.

Postupajući po predmetnoj inicijativi, shodno članovima 2. i 18., stav 1., tačka a. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti („Službeni glasnik Brčko distrikta BiH“, broj 45/10), ovaj sud nalazi da nije nadležan za postupanje u ovom predmetu, jer Zakon o sigurnosti prometa na cestama u BiH („Službeni glasnik BiH, broj 06/6, 75/06, 44/07, 84/09 i 48/10) nije zakon Distrikta.

2.

Članom 2., tačka b Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti decidno je propisano da je Apelacioni sud Distrikta nadležan da ocijeni da li je bilo koji podzakonski akt Distrikta ili bilo koji drugi pravni akt bilo koje institucije Distrikta u skladu sa zakonima Distrikta.

U konkretnom slučaju pravne kvalifikacije činjenica navedenih u inicijativi nesporno upućuju na zaključak da inicijator traži ocjenu usklađenosti podzakonskog akta organa Distrika sa zakonom Bosne i Hercegovine, a ne ocjenu usklađenosti podzakonskog akta sa zakonom Distrikta.

Upoređujući pravni smisao utvrđenih činjenica sa pravnim činjenicama opisanim u pretpostavci citirane pravne norme, nesporno je da Apelacioni sud Distrikta nije nadležan za odlučivanje u predmetnom postupku.

Imajući u vidu činjenicu da Bosna i Hercegovina kao pravna država počiva na načelima ustavnosti i zakonitosti a time i na vladavini prava, koje se obezbjeđuje kroz ustanovu kontrole ustavnosti i kontrole zakonitosti, zagarantovane članom VI Ustava Bosne i Hercegovine, za ocjenu zakonitosti predmetnog podzakonskog akta nadležan je Ustavni sud Bosne i Hercegovine. Podzakonskim aktima koje donose organi na nivou Bosne i Hercegovine, što podrazumijeva i organe Distrikta, stvara se mogućnost povrede Ustava i zakona pa je neophodna i njihova kontrola ustavnosti i zakonitosti.

S obzirom na utvrđeno činjenično stanje, shodno članu 2. i 18., stav 1., tačka a. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti, odlučeno je kao u izreci odluke.

APELACIONI SUD BRČKO DISTRIKTA BOSNE I HERCEGOVINE

Broj: 097-0-OUZ-11-000003

Brčko, 29.11.2011. godine

ČLANOVI VIJEĆA:

PREDSJEDNIK VIJEĆA

1.

Iljo Klaić

Damjan Kaurinović

2.

Maida Kovačević

